



GOUVERNEMENT
DE LA POLYNÉSIE FRANÇAISE

APOORAA A TE MAU FAATERE-HAU PARAU HAAPAPA

Mahana toru 19 no tiunu 2024

Ua putuputu te mau Faatere-Hau i teie mahana toru nei. I roto i te mau Tumu Parau i tuatapahia, ua haamanahia te mau Tumu Parau i muri nei (tera mai te tahi mau haapotoraa i muri nei) :

MFT -	2
• Haamaitairaa no te aratairaa o te Èa : Ìritiraa matamua roa no te titorotororaa rahi i nià i te parau no te Èa e te arairaa àti i Porinetia nei	2
MEF -	3
• Faanahoraa no te faaravaì atu a i te mau faaauraa Parau no te huru o te mau Âi-tarahuraa i Porinetia nei	3
MPR -	4
• Faaauraa Âmui i rotopu i te Hau Fenua e te CNRS i nià i te faaòhiparaa i te mau Ito. Te haamauraa i te tahi Pû Maïmiraa (GDR) <i>Transpolyn</i>	4
MEE -	5
• Faatupuraa i te Taùrua Paìatua i nià i te paepae no te marae Ârahurahu i Paèa.....	5
• Faaiteraa i te Puta no nià i te Tumu Parau « <i>te horue mai to na tupuraa e tae mai i te Heiva Tuàro-Nui – Horue</i> »	6



- MFT -

Haamaitàraa no te arataàraa o te Èa : Ìritiraa matamua roa no te titorotororaa rahi i nià i te parau no te Èa e te arairaa àti i Porinetia nei

I te matahiti 2023 ra, 71 751 rahiraa feia rave òhipa tei tapaòhia i te Fare Turuutaa, no roto mai i na Taiete e Pû Òhipa e 8273. E i te mau mahana tatai-tahi, te ìtehia nei e, e 7 rave òhipa teie e roohia nei i te fifi e te àti i nià i ta ratou vahii òhiparaa. Oia mau, e 2679 àti, e e 20171 e àti i nià i te òhipa, tei ìtehia, e hau atu i te 83% tei horoàhia te faaearea òhipa.

I mua i teie mau numera, haamaità atu a te huru e te arataàraa o te òhipa, te àpee tameraa i te mau hiòpoàraa a te taote, ia ìte òiòhia te fifi mai o te rave òhipa, te faaòhieraa no te mau rapaàauraa, te riro nei ia te reira, ei mau raveà papu no te faaiti mai i te mau faaearea e te mau mairiraa òhipa tei faatupuhia e te mau fifi e te mau àti i nià i te òhipa. Ua riro te reira, ei tuhaa òhipa rahi e te faufaa no to tatou Èa e tae noa atu i te parururaa totiare.

A taa noa atu ai te mau haamaitàraa no te poritita o te Èa e te arairaa i te àti i nià i te vahii òhiparaa, i faanahohia mai na i te mau matahiti i mairi, i roto i te mau Pû òhipa e te tautururaa i te mau faaauraa i rotopû i te puai ora atoà, te ìtehia nei e, 15.000 rave òhipa e òre e fanaò nei i te mau àpeeraa no te Èa i nià i te òhipa.

Ua rau te mau hiòraa no te haamaità i te faanahoraa no te Èa i nià i te òhipa i matara mai i muri aè i te mau ài-tauraa manaò e te mau Pû totiare atoà. Oia hoì :

- Tapeà noa a i te arataàraa e vai nei, e na pihaa òhipa taa ê e piti, i raro aè i te arataàraa a te mau Fatu Òhipa;
- Âmui, hoê noa aè piha òhipa i raro aè i te arataàraa a te mau Fatu Òhipa ;
- Âmui, hoê noa aè piha òhipa ma te òpere maite i te mau tiàraa e te mau mana ;
- Âmui, hoê noa aè piha òhipa ma te faaau maite i te mau raveà e te Fare Turuutaa ;
- Haamau, hoê noa aè piha òhipa tiàauhia e te Hau.

Tià noa atu ai i te mau raveà e matara mai i roto i teie mau manaò i hiòhia mai, e ìriti te Faatereraa o te Òhipa, i raro aè i te mana no te Faatere Hau no te mau Pû Òhipa a te Hau, no te Òhipa, no te mau Raveà Âpi, no te Faahutoraa i te mau Taa-Motu e te mau Faaineineraa i te mau Tiàraa Rau, i te pae hopeà no teie matahiti 2024, i te tahi titorotororaa rahi matamua roa i nià i te parau no te Èa e te arairaa àti i nià i te òhipa.

E riro teie titorotororaa ei tuhaa rahi faufaa roa i roto i te Âai o te fenua i te pae no te Èa i nià i te òhipa. E te Fâ matamua roa, o te aupuru maiteraa ia i te Èa o te feia rave òhipa e te faaitoitōraa atu a i te mau taiete òhipa o te fenua nei. E riro atoà i te haamaità atu a i te mau tûàtiàtiraa e te àraviihi no te mau faanahoraa no te Èa e te arairaa àti i te vahii òhiparaa, ma te tauturu atoà i te Hau Fenua i te faahiòraa e te faataaraa i ta na mau tereraa òhipa, i roto i te arairaa i te fifi i nià i te òhipa.

No te reira, e faaauhia e e faatanohia te mau numera no te Èa i nià i te òhipa, ia tià ia faanahohia te tahi hiòraa àmui no te huru no te mau fifi e te mau àti tumu i nià i te vahii òhiparaa i Porinetia nei.



E haa atoà te Faatereraa o te Òhipa i te haamau i te tahi mau aratairaa, ia tià faaitihia te tupuraa o te mau àti, i roto i te mau tau o ta tatou e haere atu nei. E na te reira mau aratairaa e fâito i te ineineraa e te nahonahoraa o te mau Pû Òhipa i mua i te parau no te arairaa i te fifi i nià i te òhipa. Titauhia ratou e hiòpoà e e âpee maite i te mau parau hiòpoàraa atoà o te mau fifi, te rahiraa no te mau raveà arairaa i faaòhipahia e te mau mauhaa parururaa e vai ra.

E riro teie mau numeraraa âpi ei tautururaa i te Hau i te araraa i te nuuraa o te àti i te pae o te Èa i nià i te òhipa, e to na faito i te pae o te faufaa moni. E riro teie mau tuatapaparaa ei tuhaa faufaa roa no te faanaho papuraa i te tahi aratairaa no te Èa i nià i te òhipa, ma te tuha e te faatitiâfaro maite i te reira, i rotopû i te rauraa no te mau puai ora i roto i te parau no te parururaa i Porinetia nei.

Ua tapaòhia te ômuaraa no te matahiti 2025 ei taime faahoàraa mai i te mau pahonora matamua.

- MEF -

Faanahoraa no te faaravaì atu a i te mau faaauraa Parau no te huru o te mau Âi-tarahuraa i Porinetia nei

Ua haamana te Faatereraa Hau i te ôpuaraa Faaravaìraa 1 tei faaroa i te Faaauraa Parau ia au i te huru o te mau Âi-tarahuraa i Porinetia Farani nei, tei taamu i te Fenua nei e te Pû IEOM.

I roto i te aratairaa no te huru o te mau Âi-tarahuraa, na te Pû IEOM e haapaò i te mau òhipa tumu i muri nei :

- Te fariiraa e te âpeeraa i te feia atoà i roto i te tarahu ;
- Te faataaraa i te tahi piha papàraa-parau no teie Tomite Âi-tarahuraa ;
- Te faanahoraa i te mau parau no tei âi-tarahu ;
- Te hoê tiàraa no te hiòpoàraa i te huru no te âi-tarahuraa i Porinetia Farani nei ;
- Te faaararaa e te rautiraa i te mau Pû Ora o te fenua nei ;
- Te faanahoraa no te faaararaa e te arairaa i te mau fifi.

Ei faahoàraa i teie mau tuhaa òhipa atoà, te haapapu nei te Hau Fenua e, e amo o ia i te mau faufaa moni atoà i faaòhipahia e te Pû IEOM.

Ei haamanaòraa, teie faanahoraa no te Âi-tarahuraa, ua faataahia ia no te feia atoà i roto i te fifi rahi i te faahoàraa i ta ratou mau tarahu.



- MPR -

Faaauraa Âmui i rotopu i te Hau Fenua e te CNRS i nià i te faaòhiparaa i te mau Ito. Te haamauraa i te tahi Pû Maïmiraa (GDR) *Transpolyn*

No te pahono i te mau titauraa no te parau o te Faahoturaa tuatau o te Fenua nei, i roto ihoa ra i te pae no te mau Ito Mâ, ua haamauhia te tahi pupu no te feruriraa e te maïmiraa i nià i teie nei tumu parau faufaa roa, e tei topahia te iòà “DéFiER”.

Te fâ, o te arataïraa ia i te maïmiraa i roto i te parau no te faanahoraa o te Ito i te Fenua nei e te faaineineraa i te tapura òhipa no te maïmiraa e te faahoturaa (R&D) no te mau Ito Mâ (E&R) i Porinetia Farani nei.

I raro aè i te arataïraa a teie pupu, te tahi feia maïmi no te âmui-tahiraa EnR no Porinetia Farani nei e no Farani tei rave i te tahi mau farereiraa na nià i te natireva, e na roto atoà i te tahi rururaa hopeà i Tahiti nei. Te tapura òhipa no te R&D i roto i teie tuhaa (hoê puta 48 àpi) tei topahia te iòà “DéfiER”, ua riro ia ei puòhuraa no teie mau òhipa atoà.

Ei faahoperaa i te mau òhipa i faataahia i roto i te Tapura Òhipa “DéFiER, te mau pupu no te feia maïmi o te Pû CNRS e no te Fare Haapiiraa Tuarua no Porinetia Farani nei (UPF), tei haapapu i te mau raveà i hinaarohia no te faaòhipa, e tae noa atu i te manaò e faatupu i te tahi Âmui-tahiraa no te mau maïmiraa (GDR), o te hoê ia mauhaa a te CNRS tei faaite i to na faufaa e to na maitaì. Te puè parau tuatapaparaa no te ôpuaraa e haamau i te GDR “faanahoraa no Ito i Porinetia Farani nei (Transpolyn)” ua horoàhia atu ia i roto i te rima no te Faatereraa no te mau Pû Òhipa no te CNRS i te 8 no titema 2023, no te tuu atu i mua i te mau Tomite no te Hau Farani no te haamanaraa i te reira. I te 25 no Eperera 2024 i maïri aè nei, te faararaa no te haamauraa i te GDR “te Faanahoraa no te Ito i Porinetia Farani nei (Tranpolyn)” tei haapapu roa-hia e te CNRS. Ua faaòhipahia i te ômuaraa no te âvaè Me, i te ropûraa mau no te matahiti.

Teie i muri nei, te mau Fâ Rarahi o te GDR Tranpolyn :

- Te arataïraa i te maïmiraa i te pae no te faanahoraa o te Ito, e hau atu, te faatupuraa e te faaòhiparaa i te mau Ito Mâ no Porinetia Farani nei, e aore ia, i roto i te tahi hiòraa âmui i roto i te mau fenua no te Ara-Moana, i Farani, no te haamaitaì i ta na hiòraa e te faaòhie i to na parareraa i Europa e i te ara.
- Te ìritiraa e/aore ia te haapautuuturaa te mau òhiparaa âmui i rotopû i te ao no te òhipa e te ao no te haapiiraa, i roto i teie nei mau tereraa òhipa, e te faatupuraa i te tahi mau auraa no te mau titauraa matete mai te ARN, ADEME, Europa, e aore ia, te mau tuhaa moni faataahia no te mau parau papai CIFRES ;
- Te faaineineraa i te feia âpi no te mau tiàraa taote e tae noa atu i muri aè i te Parau - Tû ìte taote, o te riro e na ratou e faaì i te area o te ao o te òhipa e te ao o te haapiiraa, i roto ihoa ra i to tatou fenua.
- Te faatiàraa i te tahi âmuiraa âpi no te mau tiàraa rau, i te pae no te uira, no te Ito, no te tuatapaparaa, te maïmiraa, te àravahi i te pae no te mau materia, tei pûpû i ta na mau òhipa i maïmi i te mau Ito no te mau tau i maïri nei.
- Te faatupuraa i te mau pû haapiiraa ia au i te tahi mau tumu parau pâpû maitaì, na reira atoà te mau rurura rahi no te haapautuutu i te mau ai-tauraa i roto i teie mau âmuiraa âpi, e ia faaânohia atu a, i te mau âmui-tahiraa no te feia maïmi.



Te Rururaa Tumu Matamua roa (Kick off meeting) a te GDR Tranpolyn, e tupu ia mai Porinetia Farani atu nei, i te mahana maha 20 no Tiunu i muri nei, mai te 7H30 e tae atu i te 9H30 i te poi'poi. Te feia māimi no te CNRS o te tae mai no teie nei faanahoraa i te UFP, e taima atoà ia tei faataahia no te âvari i te 19 no tiunu, i te "Fare Ito", tei faatiàhia i roto i te âua no Outumaoro.

- MEE -

Faatupuraa i te Taùrua Paìatua i nià i te paepae no te marae Ârahurahu i Paèa

E faatupu te *Fare Ûpa Rau* no Porinetia Farani nei, e ono aè taùrua a te pupu *O Tahiti E* i nià i te paepae no te marae Ârahurahu no Paèa i te mau mahana maa 13, 20 e 27 no tiurai, e te mau tapati 14, 20 e 27 no tiurai 2024.

Na teie pupu tuiroo tei matauhia e tei ìte maitàhia i roto i te Heiva, i raro aè i te arataìraa a Marguerite LAI, e faanaho mai i te hoê taùrua i nià i te tumu parau « *Paìatua* », ìritihia mai mai roto mai i te hoê peu no tahito roa mai, i nià i te faaàhuraa e te haa-vai-taha noaraa te hoê atua tiaì no te tahi marae, i muri aè te tamâraa-hia e te haamoàraa-hia teie marae.

Hau atu i te hanere feia ori, himene e haùti te ô atu i roto i teie taùrua, ômuahia mai e te tahi mau haùti taata ora no te fariiraa i te nahoà rahi e âmui atu, e tae noa atu i te tahi vahi i faataahia no te feia rima î.

Mai te matahiti 2014 ra to te Fare Ûpa Rau tiàauraa mai i te teie nei taùrua i nià i te paepae no te marae Ârahurahu no Paèa. Teie mau Taùrua, ua riro ia ei mau taima faufaa roa i roto i te tereraa òhipa no te Heiva i Tahiti, te auhia e te nahoà rahi e tae noa atu i te mau ratere, te fanaò no te taima matamua roa, i te tahi tuhaa moè no to tatou hiroà t umu maòhi.

1.000 parahiraa o te faanahohia no te fariiraa i te feia mataitài, i te mau faaiteìteraa tatai-tahi, e te reira, na roto ia i na tiàraa parahiraa too-toru, haamauhia e te mau pupu òhipa, no te Pû o te mau Raveà Rau(SMG) no te Peretiteniraa : e 2 tiàraa parahiraa e 200parahiraa e 1 tiàraa parahiraa e 600 parahiraa. Te moni titeti i faanahohia e 2.000 farane no te feia 12 matahiti e hau atu, e 1.000 farane no te mau tamarii i raro mai i te 12 matahiti. Ua faataahia te mau tieti tahinu no te feia huma, ia au i te mau parahiraa e toe mai. E horoà atoàhia hoê hanere parahiraa, i te mau mahana haùtiraa atoà, na te mau tamarii no roto mai i te mau aroa fifi, te Village SOS, e aore ia na te mau Pû no te mau òhipa totiare.

No teie taùrua, na te Fare Ûpa Rau e tiàau mai i te hooraa titeti. Te moni tohu e manaòhia ra noo teie faanahoraa, tei nià ia i te faito e 6 mirioni Farane.



Faaïteraa i te Puta no nià i te Tumu Parau « *te horue mai to na tupuraa e tae mai i te Heiva Tuàro-Nui – Horue* »

Te haapaò maite noa ra te Pû no te Faatereraa o te hiroà e te faufaa tumu i ta na mau arataïraa no te turama e te haaparareraa i te faufaa tupuna tumu ma te faaïte atu ia òutou i ta na puta iti âpi i nià i te tumu parau no « *te horue mai to na tupuraa e tae mai i te Heiva Tuàro-Nui – Horue* », no roto mai i te vairaa puta Hono a uì.

No te mea e tupu te mau tataùraa no te Heiva Tuàro-Nui no Paris 2024, i Teahupoo, i riro ai teie tuàro ei mea òhipa faufaa o te òre e tià ia àpe, ma te òre e faanaho papu i te reira.

Te riro nei teie òhipa ei raveà no te faaïte, e aore ia, no te faaiho faahou mai e nohea mai te horue ta te maòhi i rave na mai te tau âuìuì mai. Te faaïte papu atoà mai nei i te huru mau no teie nei àre taa ê roa no Pererure, tei faahiò mai i te riri o te Pere, te vahine atua o te mau mouà auahi, tei haamorihia na i Taiàrapu, e tei faaàrepurepu i te moana. Te riro nei teie puta iti ei mauhaa tei paèpaè maità i teie tuàro, tei ìtehia, i te roaraa o te tau, to na nuuraa rahi e tei riro atoà ei raveà tei tauturu maità i te pae no te oraraa totiare.

E fanaò tatou i teie puta iti i nià i te tahua nati reva a te Pû Faatereraa no te hiroà e te Faufaa tumu. Ua neneihia 1.000 mau puta iti o te ôperehia namua roa i roto i te mau fare haapiiraa o te fenua nei.

SERVICE DE LA COMMUNICATION
